



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 879 vum 12. Juni 2024 vun der honorabeler Deputéiert Madamm Nancy Arendt.

Wéi huet sech d'Zuel vun de Mënschen, déi duerch hiren Drogenkonsum gestuerwe sinn, hei am Land entwéckelt (2022-2023)? Wéi eng Substanze sinn haaptsächlech fir déi Drogendoudege verantwortlech? Op wéi eng Droge sinn déi meescht Drogendoudeger zrëckzeféieren?

Déi aktuellsten Donnéeën déi dem Ministère fir Gesondheet a sozial Sécherheet virleien, weisen drop hin, dass den Taux vun der Stierwegkeet, deen direkt mat engem Drogenkonsum verbonnen ass, an de leschte Jore generell erof gaangen ass. Während am Joer 2015 insgesamt nach 12 Iwwerdosis-Doudesfäll registréiert goufen, sinn 8 Iwwerdosis-Doudesfäll am Joer 2022 an 9 Fäll am Joer 2023 gemellt ginn.

D'forensesch Donnéeë vum Département Toxicologie vum Nationale Gesondheitslaboratoire weisen datt déi Substanzen déi am heefegsten an Iwwerdosisfäll detektéiert goufen, un éischter Plaz d'Opioïden sinn an un zweeter Plaz Kokain ass. D'Expertisen déi an de leschten zwee Joer duerchgefouert goufen, weisen op een Drogen-Polykonsum bei all deene verstuerwenen Iwwerdosis-Fäll hin. An de Joren 2022 an 2023 waren déi Substanzen déi am heefegsten an Iwwerdosisfäll nogewise goufen Opioïden, Kokain, Berouegungsmëttel/Sedativa (Benzodiazepinen), Cannabis/THC, Antidepressiva an/oder aner antipsychotesch oder opioïd Medikamenter.

D'Baisse vun Doudesfäll duerch Iwwerdosis ka virun allem mat der Entwécklung vun den nidderschwellegen Risikoreduktiounsstrukturen, notamment der Aféierung vun den iwwerwaachte Konsumraim a Verbindung bruecht ginn. Zousätzlech hunn d'Dezentralisatioun an d'Erweiderung vum Programm vun der Substitutionsbehandlung mat Opioïd-Agonisten eng Verbesserung bruecht. Bis elo gouf et am Grand-Duché kee fatale Fall vun enger Iwwerdosis an enger vun den nidderschwellegen Strukturen, déi iwwerwaachte Konsumraim ubidden.

Wéi effektiv sinn eis aktuell Präventiounscampagnen? Ginn et genuch Behandlungs- a Rehabilitatiounsprogrammer ?

D'Offere vun de Präventiounscampagne ginn am Kader vum nationalen Drogeplang 2020-2024 permanent weiderentwéckelt an dat op Basis vun den identifizéierte Besoinen an de Moosnamen iwwer d'Problematik vun der Drogenkriminalitéit zu Lëtzebuerg.

Wéi wierksam sinn d'Mesuren zur Bekämpfung vum Drogenhandel ?

Generell ass unzemerken dass quasi all Affär vun Drogenhandel eng Rei transnational Komponenten opweist, wat dozou bäidréit dass sech d'Enquëten an deem Beräich kënne schwiereg a laangwiereg gestalten. Lëtzebuerg ass an dem Zesummenhang och op déi international Zesummenaarbecht ugewisen a setzt verstärkt op eng gutt Zesummenaarbecht a Koordinatioun mat eisen Nopeschlänner.



Doriwer eraus ass d'Police net nëmmen mat Enquête'en befaasst, mee an 3 Beräicher vun der Bekämpfung vum Drogenhandel aktiv:

Präventioun

D'Police bitt Sensibiliséierungs- an Oplärungskueren an de Schoulen a Lycéeën un. Wann eng Demande do ass, kënnen och Eltere vun dëser Offer profitéieren. Am Joer 2023 sinn 166 Seancen an de Primärschoulen (2022: 126) an 346 Seancen an de Lycéeën (2022: 303) gehale ginn.

Repressioun

Am Kader vun de proaktiven Aktiounen (méi wéi 200 pro Joër mat ëm déi 1000 engagéiert Leit um Terrain) um Terrain, mécht d'Police Persounekontrollen, traitéiert Flagrants délits a féiert Actions d'envergure duerch fir e permanenten Drock ob Dealereen opzebauen, Visibilitéit ze weisen an se ze stéieren.

International Police-Kooperatioun

Kontrolle wéi d'Hazeldonk Kontrollen (Kooperatioun tëschent Benelux a Frankräich am Kader vun der Bekämpfung vum Drogentrafic) ginn och mat der Kollaboratioun vun der Douane duerchgefouert. 2023 huet Lëtzebuerg un 3 Hazeldonk Operatioune participéiert.

Da geet et um Niveau vun den Enquêtë net nëmmen drëms den einfache Stroossendealer ze verhaften, mee och eng ganz Struktur vun enger krimineller Organisatioun ze demanteléieren. 2023 sinn sou 3129 Infraktiounen am Beräich vun den Droge festgestallt ginn. 187 Persounen déi géint Drogegesetz verstouss hunn si verhaft ginn.

Wéi eng Ännerungen un der Gesetzgebung kéinten d'Situatioun nach verbesseren ?

Et gi reegelméisseg Iwwerleeungen an Aarbechten ënnerholl fir de Justizautoritéiten déi neidesch Outilen a Moyen'en ze gi fir kënnen effikass ze sinn am Kampf géint den Drogenhandel an déi organiséiert Kriminalitéit.

Lëtzebuerg, den 13.. August 2024

D'Ministesch fir Gesondheet
a sozial Sécherheet

(s.) Martine Deprez